

東
華
續
錄

東華續錄

同治六十五

臣王先謙敬編

臣張式恭恭校

秋七月壬子朔諭軍機大臣等劉長佑奏先辦土匪兼顧河防一摺直隸土匪敗竄山東臨清復回竄直境由曲周平鄉擾及隆平縣屬之蓮子阮該處鄉團接仗多所傷亡總兵劉雲鶴督軍馳至斃賊百數十人餘匪向杭楷深處竄逸此股敗匪雖僅三四百人誠恐飢民煽惑一經響應又成巨股著劉長佑督飭該總兵及調回之余承恩等乘此聲威迅速分投搜剿務期殄滅無遺毋令再有延蔓山東館陶邱縣一帶於賊竄近時卽有教匪傳帖入夥是該處伏莽已形蠢動並著丁寶楨嚴飭該處地方官實力稽查彈壓以絕亂萌毋任勾結起事至黃運兩防均關緊要其調度機宜

著劉長佑隨時妥籌兼顧務臻穩密本日據左宗棠奏請調直隸候補道祝壇赴營差遣等語該員若在直隸著劉長佑催令迅赴左宗棠軍營聽候差委將此由五百里各諭令知之○左宗棠奏臣率各營於五月十三日由樊城啟行六月十三日始抵陝州屬之靈寶縣次日由稠桑驛至閿鄉師行函谷之間兩面峭壁矗立一徑縈紆午後臣率各軍甫出谷口申酉之交忽大雨傾盆山湏暴發後起車馬擊損頗多押解之弁勇車夫漂溺死者數十名軍火輜重漂沒無存幸各軍隊伍均攜軍械隨行在前礮車所載子藥毫無損失倉卒之際得以從容鎮定經理一日仍率所部啟行十八日行抵潼關得劉典緘報十六日已抵藍田沿途勞苦情形正復相似高連陞已於初四日行抵樊城此時計可拔隊而西捻逆屢爲劉松山等所敗亟圖竄豫聞臣與劉典大軍東來避竄渭

北擾及同朝復爲劉松山等所敗東阻大河爲晉防水陸所扼見
又西竄蒲城境地疊據劉松山稟報賊勢衰蹙不踰兩三萬能戰
者不過萬餘惟健馬尙多故能飄忽如常見值伏暑時疫流行賊
衆多病而官軍奔馳半載轉戰勞瘁疫病亦復不少陝回之敗遁
甘肅者均乘捻逆之亂絡繹回陝復有隨教漢民飢潰兵勇同惡
相濟其蹤迹與捻時離時合北山一帶徧受其擾此外土匪千百
成羣時出劫殺陝境已無完土臣駐潼關劉典駐藍田暫資休息
先遏賊竄豫鄂之路一面偵察賊蹤妥爲調遣一面籌畫軍食免
致匱乏務將捻逆就地殄除以防滋蔓 上諭左宗棠所率各軍
冒暑徃征頗形勞瘁而於函谷倉卒之際得以從容鎮定覽奏甚
慰捻逆疊經追剿其勢已衰正可乘機翦滅著左宗棠卽督飭劉
典各軍嚴密兜擊悉數殲除肅清陝境毋令出竄豫鄂復肆蔓延

高連陞所部已派漢西上並著該大臣及早迎提以厚兵力至所稱陝回及兵勇土匪擾害情形卽著妥籌辦理另片奏請調員差遣等語直隸候補道祝塏已諭知劉長佑催令前往如尙在李鴻章軍營著卽飭令赴陝四川卽補知府唐炯著駱秉章飭赴左宗棠軍營聽候差委將此由五百里各諭令知之○命江蘇等省採買米石運直隸平糶○癸丑河南巡撫李鶴年奏馳抵運防分段認守並抽派宋慶一軍赴膠萊會剿及回省整頓河防得旨著卽飭令在事各員認真防剿荆子關一路前已寄諭李瀚章等仍令派兵防守卽著飛速咨催以厚兵力該撫見已回省仍當確探軍情相機策應○甲寅諭軍機大臣等英翰奏親抵宿遷布置運防並請飭催江海關協餉各摺片英翰親赴邵宿一帶與張之萬酌量情形並將皖軍下移以補清淮之不足尙能不分畛域著卽責

令張得勝等剋期築牆分段扼守仰化集以下東至海濱地廣兵單張之萬當就見有兵力先行分紮布置曾國藩所調陞字營一軍李鴻章所調浙勇五千均著迅飭到防以期嚴密捻蹤飄忽靡常運防最爲喫重李鴻章務當豫籌守禦毋令乘虛竄出致誤全局至江海關應協皖餉前經部議照常撥解見在皖軍出境防堵需用甚急著曾國藩郭柏蔭按月籌撥不得仍前延誤將此由六百里各諭令知之○總理各國事務衙門奏請採買洋米以濟民食從之○乙卯諭軍機大臣等都與阿奏剿敗撲犯孤山匪徒並遼陽昌圖緝捕情形一摺木匪王作幅夥黨竟敢藏匿海島乘船糾眾竄擾鳳城孤山等處雖經都興阿派兵擊敗陣斃匪首於正潞而三道浪頭等處山險路歧匪徒到處散匿恐其勾結聚成大股該將軍務當設法搜剿以絕根株不得但以分守水口要港養

癰貽患遼陽昌圖各匪雖經官兵擊散在逃之趙希哲及趙貴等亦當上緊緝獲見在登萊一帶捻氛肆擾奉省海口亟應防範並自該將軍嚴飭海口各屬詳慎稽查毋任該匪偷渡致釀亂萌地乃不靖責有攸歸該將軍須振刷精神將各路匪徒及在逃首匪認真緝捕毋再因循貽誤懷之本日復有人奏直隸豐潤縣開平鎮一帶向有匪徒擄設天罡會名目潛聚多人欲於八月間赴奉天遼陽州迎請教主等語趙希哲潘秉得等所習邪教是否卽係天罡名目抑另有他股教匪潛伏遼陽著都興阿確實查明嚴拏懲辦毋任與直隸匪徒勾結原片著鈔給閱看將此由五百里諭旨知之○諭傳諭廣西巡撫吳昌壽吳昌壽奏鎮安官軍攻克馬都安兩賊巢一摺鎮安賊匪以吳亞終爲大股踞伏歸順負隅守馬隘都安兩股與吳逆狼狽爲奸經吳昌壽督飭官軍將馬

都安兩處賊巢攻拔正可騰出兵力專辦歸順一路著卽嚴飭各軍乘此聲威迅攻歸順老巢務期殲除首逆毋任久踞逆匪黃付勝張三著查明下落嚴緝弋獲不准漏網該署撫蒞任伊始號令一新正可嚴飭各將士共加奮勉肅清邊圉以竟全功以副委任將此由四百里諭令知之○命太常寺卿石贊清等稽察賑務○丙辰諭內閣直隸地方近有梟匪肆擾疊據劉長佑奏報派兵剿捕多名並稱餘孽僅贖百餘向隆平東南竄逸勢漸瓦解覽奏各情不難剋期撲滅乃本日該督奏稱匪黨被剿竄過滹沱河岸人數加多仍向東北狂竄等語何以與前奏大相歧異劉長佑調度乖方任聽屬員粉飾率行入告實屬大負委任著交部嚴加議處該匪奔竄多處來往自如並有土匪排船接渡該管地方官所司何事何以毫無防範著劉長佑查奏有無縱賊捏報及此外帶

兵各員有無畏蕙粉飾情弊均著嚴行參辦該督見已添派兵勇分路兜擊著嚴飭在事員弁認真剿辦各營將士如有追剿不力虛報勝仗者卽著按軍法從事劉長佑務將此股賊匪及早殲除以贖前愆毋得玩愒如前致干重咎也尋吏部議上劉長佑應照溺職私罪例革職得旨著加恩改爲革職畱任○諭軍機大臣等丁寶楨奏賊勢未動亟籌修整河牆並籌剿北路梟匪各摺膠萊河等處河岸興築土牆固以遏賊之奔突惟捻逆麇集卽墨蓄意南趨非有勁軍旁鈔夾擊斷無自驅於海之理且大雨時行各河牆隨坍隨補必致展轉耽延有妨戰事是河牆雖應修築一面仍當督飭劉銘傳各軍相機進剿不得以賊勢未動託故遷延此時大軍齊赴東境兵力不爲不厚李鴻章丁寶楨務須力圖截事毋以成見自封轉滋貽誤煙臺爲商賈輻輳之區前由崇厚派往之

洋隊自未便遠行撤回應如何增兵協守之處著崇厚會商丁寶楨等妥籌辦理丁寶楨奏直省梟匪竄擾臨清館陶等處已飭龔易圖等分兵會剿各情本日據劉長佑奏鹽匪人數加多仍向東北狂奔等語此股梟匪前經該督奏稱南竄無多何以旬日之內復聚至七八百人並有土匪勾結竄過滹沱河擾及清苑各處其情節支離顯爲蒙蔽粉飾所誤甚屬可惡仍著該督嚴飭劉雲鶴等覘賊所向實力剿除並飛檄余承恩劉景芳等會同掩擊均當不分畛域與龔易圖等合力剿滅毋得以驅出直境爲了事丁寶楨亦當嚴檄龔易圖扼守直東交界認真接拏如互相推卸致令南北回竄四處蔓延惟劉長佑丁寶楨是問其各振刷精神毋干重咎將此由六百里各諭令知之○允裕瑞等調蒙兵分防歸綏○丁巳諭穆圖善等嚴防甘肅山西毗連境地○廣湖北崇陽

縣學額六名四川漢瀘廣安彭巴梁山資陽內江中江洪雅隆昌
各二名江北眉忠簡資合涪巴溫江萬樂山灌名山什邡墊江雅
安新津達樂至雙流金堂東鄉射洪新都郫三臺彰陽新甯鄰水
德陽渠儀隴羅江安營山長壽閬中南充江津永川南部西充大
足定遠通江夾江犍爲榮威遠宜賓南溪富順彭山大邑蒲江江
安合江蓬縣崇慶華陽銅梁峩眉各一名○展五城飯廠暨普濟
堂功德林煮賑兩月○戊午廣順天滿洲蒙古學額五名漢軍二
名○予山西陣亡遊擊朱煥友等祭葬世職○己未雨 上詣
大高殿報謝○諭軍機大臣等劉長佑奏勦捕鹽匪情形並請派
員總統遵化練軍各片西路鹽匪竄向安州東路復有新起鹽匪
竄擾甯津吳橋等處恐其聚成大股劉長佑崇厚務當嚴飭所派
將士分路兜截迅速勦除不得再任蔓延致干咎戾劉景芳所統

練軍既經調回河間所有齊河至張秋一帶河防卽著責成唐訓方接辦並將見駐河間之遵化練軍兩營調赴齊河以厚兵力定安因整頓密雲旗兵未能兼顧遵化練軍事務著卽派令春霖前往接統並接署通永鎮篆務以專責成黃仁遺業經部議革職著准其畱營帶隊以觀後效將此各諭令知之○諭穆圖善奏賊撲延安郡城官軍進剿獲勝等語陝西甘泉縣城收復後該匪糾集大股逼近延安郡經總兵胡世英督隊進剿斃匪多名惟賊勢正熾並未大受懲創仍著穆圖善督飭胡世英勉力進取以保郡城毋稍疏懈五品花翎馬明起衝鋒陷陣尙屬出力著以都司補用先換頂帶前據喬松年奏派胡世英辦安塞保安定邊一路與程興烈合剿專顧陝境西北胡世英見紮延安雖與安塞一帶毗連深恐地廣兵單不敷剿辦著左宗棠喬松年斟酌情形妥籌兼顧

陝省北邊逆氛徧地竄越堪虞該大臣等仍須懷遵前旨設法籌辦不得任賊竄逸晉疆胡世英一軍進剿正在喫緊口糧深恐不繼著喬松年飭令延安府知府在於附近地方設法籌撥糧石源源接濟以備軍食將此由五百里各諭令知之○庚申諭軍機大臣等國家設立督撫委任綦重力矢公忠和衷共濟方於理財用人諸大端綱舉目張封疆庶期靖謐茲據兩廣總督瑞麟參奏巡撫蔣益澧任性妄爲劣蹟彰著署藩司郭祥瑞朋比迎合相率欺蒙恐誤大局一摺覽奏殊堪詫異蔣益澧前在廣西曾經獲咎朝廷棄瑕錄用因其戰功卓著由司道厯擢巡撫宜如何感激圖報力改前非若如瑞麟所奏聚勇自衛袒護同鄉東西江已無大股賊匪仍不任地方文武藉勦捕爲豪勇地步廢制兵糜帑項悍然弗恤朱亞春一案顛倒是非郭祥瑞違例牽就反將執法之丁浩

訶斥且聲稱廣西有欠發勇糧糧向廣東軍需局勒取並因署內
脩金薪水等費藉詞提軍需釐金局公項計二萬餘兩郭祥瑞不
查例案一味阿比任意提支殊形冒濫裁汰太平關規費後自生
懊悔乃令藩庫月撥三百兩運庫月撥七百兩爲撫署月規授意
郭祥瑞向瑞麟聲請其委署素亂舊章越俎阻撓營制左袒隨員
挾私任意將粵海關之差役王六忽擊忽放無辜之邱根嚴押致
斃種種劣蹟不可枚舉郭祥瑞一味逢迎濫動庫款不顧大局如
果屬實大干法紀著吳棠馳赴廣東會同慶春秉公查辦不得含
混了事代人受過至遷怒幕友傳諭驅除該幕友有無聲氣鄭夢
玉升署知府密保之摺何以不先行商酌卽列銜具奏有無冒濫
均著詳細查明務昭嚴實摺一件片二件鈔交吳棠俟馳抵廣東
後卽與慶春閱看不准先行宣露將此由五百里密諭知之○諭

丁寶楨奏捻股搶撲膠萊河防經官軍擊退並梟匪回竄直境情形一摺捻逆於七月初一日大股猛撲膠萊河防經楊飛熊王成謙等連環策應先後斃賊數百名該逆敗渡沽河又被馬步追剿淹斃者一千數百名見由平度回竄萊陽境內該逆此次搶渡未遂必不肯坐困絕地其乘間潰逸仍在意中丁寶楨所築河牆計日可以竣事著親督各營密益加密毋使有隙可乘北路情形劉銘傳潘鼎新兩軍能否堵禦李鴻章遠在濟甯於前敵調度機宜深虞緩不濟急運防固關緊要然賊斷無坐以待斃之理官軍連與相持且恐養其銳氣一旦潰裂將不可支著該大臣斟酌情形身臨前敵督飭銘鼎兩軍奮力進剿以期呼應較靈一面分飭得力將弁趕辦運防以守以剿庶不至藏事無期賊匪購買洋人軍火最宜防備著飛咨沿海各省加意巡查以杜勾結北路梟匪見

已竄至清苑屬之北河等處蹤迹甚爲飄忽著丁寶楨嚴飭翼易圖等嚴防直東交界多設偵探不令再有蠢動備直隸股匪仍竄東境並卽派軍會同掩擊迅圖撲滅將此由六百里各諭令知之

○命吳棠馳赴廣東查辦事件以英桂兼署閩浙總督

由福州將軍兼署

○辛酉諭軍機大臣等順天府奏梟匪回竄入境請飭會剿一摺

梟匪前向安州東竄茲已竄擾固安永清雖經直字營及保定練軍跟蹤追躡匪蹤飄忽並未大受懲創畿輔重地豈容該匪肆意奔突劉長佑勦辦此股賊匪毫無把握此時若不迅圖撲滅稍贖前愆自問當得何罪見在匪股由永清東南奔竄本日神機營已派馬步三千餘名前往兜拏卽著該督嚴飭費學曾等覘賊所向會合夾擊毋得縱賊自如始終貽誤並著崇厚催令派出兵弁一體會剿以期及早肅事胡肇智仍當嚴飭地方官激勵鄉團會剿

並勤加偵探毋稍疏懈將此由五百里諭令劉長佑崇厚並傳諭胡肇智知之○諭前因左宗棠奉命西征特令沈葆楨總理船政茲據沈葆楨奏報任事日期並懇陳各情覽奏具見誠惻船政事宜本非旦夕所能奏效左宗棠以事當蒞始專摺請派其知該前撫者實深該前撫清慎之懷中外共見朝廷因事擇人亦期任事者以朝廷之心爲心並非浮言可奪該前撫見已任事惟當勉爲其難卽著督飭周開錫等實力講求並將日意格等加意籠絡庶觀成有日用以自強毋得瞻前顧後有誤鉅工沈葆楨以本地紳士督辦船政必須地方大吏聯爲一氣呼應始靈英桂吳棠李福泰務當和衷商辦俾該前撫永無掣肘之虞其應需經費並著英桂等隨時經理以竟全功將此由五百里各諭令知之○廣廣東廣州府學額一名直隸邯鄲縣學額三名襄城二名江蘇儀徵七

名嘉定昆山新陽各四名湖北隨州六名江西峽江六名湖南武岡桂陽各五名零陵桃源各四名耒陽宜章各三名郴衡陽甯遠永明武陵永興興甯桂東各二名澧茶陵攸安化安仁澁浦石門常甯酃各一名四川三臺十名成都西陽各八名資華陽江津犍爲各六名合內江各五名長壽開資陽各四名江北溫江灌新都什邡鄰水萬梁山合江興山各三名崇慶彭廣元射洪巴永川銅梁大足榮昌定遠墊江江安威遠各二名漢簡涪忠達瀘崇甯郫新繁新津雙流金堂德陽安梓潼彰明江油蒼溪閬中榮隆昌井研豐都南溪達東鄉新甯南充儀隴鹽亭樂至中江營山洪雅各一名○癸亥諭軍機大臣等都興阿等奏探聞山東髮逆竄擾情形飭濱海各城嚴防一招岑厚奏嚴防捻匪搶掠海船等語東省捻匪經各軍偏諸膠萊河東其勾結匪徒入海亦在意中李鴻章

必當通盤籌畫計出萬全著與丁寶楨飭令沿海各地方官嚴禁
商船傍岸免致該匪乘間搶掠尤須嚴防奸宄在海濱接濟匪徒
毋稍疏失致誤全局登州海口與金屬一水相通被難百姓不免
航海北渡著都興阿等通飭濱海各城嚴防匪徒勾結奉天邊外
餘匪仍著趕緊嚴拏毋令散匿昨據丁寶楨奏賊匪購買洋人火
藥已著該撫飛咨沿海各省加意巡查著都興阿崇厚等認真緝
拏嚴爲之備東省水師船隻爲數不多且恐未能堅實上海所設
捕盜輪船堅固迅捷素稱得力著曾國藩速飭應寶時多撥船隻
挑選得力將弁配齊礮火駛赴煙臺一帶交丁寶楨督同潘蔚就
近調遣至登萊沿海口岸較多李鴻章丁寶楨都興阿崇厚各當
督飭將弁及各地方官嚴密巡防毋干重咎將此由六百里各諭
令知之○署貴州巡撫張亮基奏趙德光等軍聲退定番大塘窺

匪地方漸臻綏靖得旨著督飭趙德光等迅圖攻拔老巢以清邊境一奏請調前鎮遠鎮總兵官張文德等赴營差委允之○甲子允兆琛奏建祠湖南省城彙祀陣亡弁勇○于貴州陣亡副將劉烈等祭葬世職○丁卯諭內閣本日侍郎魁齡等奏香山櫻桃溝等處新修石渠有被山水衝汕情形其辦理草率已可概見工部左侍郎魁齡通政使司通政使于淩辰大理寺少卿王維珍內閣侍讀學士文碩均著交部議處仍著照例賠修○戊辰調察哈爾牧羣馬五百匹赴庫克吉泰軍○庚午諭軍機大臣等劉長佑奏剿捕鹽匪情形並出省督軍一摺梟匪由安州東竄固安一帶經劉長佑派兵追捕該匪展轉奔竄向阜城衡水等處南趨劉長佑見擬出省親督剿辦著卽嚴飭各路兵勇並劉景芳所部四面兜擊迅速殲除阜城等處緊接東省丁寶楨當檄地方文武合力會

勦以淨根株毋任蔓延甯津吳橋另股鹽匪前據崇厚奏稱已飭
防河之副將文瑞折回滄州勦捕見據劉長佑聲稱此股梟匪均
已逃匿無蹤其散往何處作何勦捕並未詳細陳明著劉長佑崇
厚會督兵勇實力嚴查按緝以杜復萌武定爲鹽匪聚集之區丁
寶楨尤應嚴密督捕毋稍疏懈將此由五百里各諭令知之○署
湖廣總督李瀚章等奏遵派姜玉順一軍馳赴豫境扼守荆子關
得旨著卽飭令姜玉順統帶所部迅赴荆子關駐防扼守毋稍延
緩○永定河溢○辛未廣江西吉安府學額五名直隸曲周縣一
名安徽霍山七名太湖廬江各六名無爲阜陽各四名銅陵三名
湖北荆門監利襄陽各三名咸甯蒲圻大冶黃陂孝感蘄水廣濟
鍾祥南漳各二名沔陽隨均武昌通城漢川京山潛江安陸雲夢
石首松滋枝江棗陽宜城穀城鄖房保康長陽恩施當陽各一名

○癸酉李鴻章奏

臣

於六月間親往東境運河周歷查勘督催修

牆七月初間運西長牆一律完整所有沈口戴廟至靳口一帶運

防暫令豫軍張曜勻紮自靳口下至濟甯係淮軍周盛波劉秉璋

分地必須鄂軍譚仁芳劉維楨前來接替方可抽調進剿譚仁芳

等因沿途阻雨於七月十二十三日始抵歸德睢州等處

臣

復專

弁嚴催務於二十日趕到以便抽隊換防蘇境運河最長李昭慶

以十九營分守韓莊至貓兒窩一百七十里據報長牆已將竣工

自貓兒窩至宿遷仰化集係安徽撫

臣

英翰親督皖軍布紮漕

張之萬清淮各軍橫守六塘河接至仰化集止但慮秋後六塘水

涸難資設險飛調淮揚水師王鍾華魯洪達三營自宿遷以下沿

運分紮並緘商浙江撫

臣

馬新貽酌派候補道李耀南等帶楚勇

三千人備齊糧餉刻日北行並添調水師兩營相爲依護該軍到

後應自仰化集接守至桃源池南並令隨時稟商漕臣就近調度
與清淮防軍互爲策應至膠萊河防自六月下旬銘鼎奇鳳四軍
與東軍先後趕築長牆劉銘傳統率諸軍分布七月初一日賊由
卽墨回撲麻灣一帶丁寶楨督東軍擊退復竄平度卽墨交界距
淮軍汛地三四十里劉銘傳督軍守禦賊不敢近初七日游騎駛
近潘鼎新防所亦被擊走初八初九等日竄至萊州附近豫軍宋
慶於初三日趕到填紮新河至楊家園淮軍王永勝於初八日趕
到填紮吳家口一帶惟潘鼎新由新河橫紮至濰河西岸自新安
莊北至海口尙空五六十里劉銘傳潘鼎新暫派馬隊六營沿河
巡哨仍須步隊扼紮聞王永勝到防後已騰出東軍王成謙所部
移守濰西昨據提督傅振邦呈稱該提督籍隸昌邑熟悉情形請
調該軍回籍會團進剿當經批令率所部一千二百人馳赴濰西

勸集團練協力防堵見在丁寶楨與劉銘傳等業將膠萊防務勻
紮周妥自須添兵輪替進剿計鄂軍譚仁芳等二十日內外可到
臣卽督同劉秉璋周盛波萬餘人於二十一二等日分起由濟南
青州親赴前敵妥籌剿辦查膠萊河南至塔埠口二百六十里其
中淤淺甚多自新河橫出濰河北至下營又百餘里加之南北海
口沙灘亦須酌時布置守兵必須五萬人分路進戰又須三四萬
人曰下前敵合軍分守不敷進戰如膠防稍有把握似須酌
撤運防全軍併往更番戰守庶可就地殄除昨准英翰函稱擬派
得力統將帶萬人前往助剿臣已臧復允行若仍不敷用當再相
機酌調上諭軍機大臣等膠萊河防布置漸臻穩固各省防運
之軍亦催調漸齊該逆被圍情急必圖乘間竄撲亟應添兵輪替
進剿著李鴻章督同劉秉璋等卽由濟南青州前進親臨前敵妥

爲調度譚仁芳劉維雨軍見因阻雨尙在歸德睢州著李瀚章曾國荃嚴檄各軍迅赴防所以便抽出防兵相機進剿並著李鶴年將該二軍設法催趨俾令迅速成行皖軍填紮貓兒窩一帶見亦就緒英翰並擬派得力統將另帶萬人助剿尙能不分畛域卽著英翰趕緊調派以資厚集如仍不敷布置李鴻章卽與該撫會商再行酌調丁寶楨務當督飭本省各軍會籌掃蕩毋稍疏懈匪徒高歸等聚眾在邳州郟城等處肆行劫掠張之萬派兵搜捕接仗失利著李鴻章等檄飭派出各軍合力剿除迅殲醜類參將王文行見在豫營著李鶴年飭令該員前赴張之萬軍營聽候差遣李鴻章以梟匪滋事令張樹聲毋庸協守運隄派余承恩三營馳回大名此軍到後著劉長佑妥籌調派該督見已出省督勦務當認真搜捕剋日殄除以便騰出兵力專剿捻逆將此由六百里各

諭令知之○乙亥諭軍機大臣等劉嶽昭奏滇軍攻拔豬拱箐老
巢一摺劉嶽昭所部楚軍進攻牛場等處斷賊外援岑毓英親督
滇軍攻克尖山疊敗撲營之賊斬獲甚多並將老巢及山頂巨巢
攻毀十餘年積匪全數掃蕩勦辦奮勇甚屬可嘉所有出力傷亡
員弁兵勇著劉嶽昭查明奏請分別獎卹首逆是否被殲並著確
查具奏滇黔邊境餘匪仍著責成岑毓英勦捕以期一律蕩平所
有善後事宜卽著張亮基揀派黔省委員妥爲辦理劉嶽昭俟黔
西肅清後卽當督率所部馳赴滇省相機鎮撫岑毓英一軍將來
應赴何路剿捕並著劉嶽昭斟酌情形辦理前據劉嶽昭奏稱黔
亂已深請解散賊勢以安人心一摺黔省亂民多由倡脅劉嶽昭
所陳情形並辦理解散之法均係正本清源之論張亮基身任黔
撫責無旁貸著卽按照所奏認真籌辦出示剴切曉諭宣布朝廷

德意解散脅從予以自新仍揀選賢能牧令妥爲撫恤以靖地方
劉嶽昭原摺著鈔給張亮基閱看將此由六百里各諭令知之○
丙子諭軍機大臣等穆騰阿奏統兵追剿行抵冀州神機營奏據
報跟追梟匪情形各一摺梟匪前擾固安永清一帶聞官兵四集
晝夜狂奔已由河間景州等處向西南回竄穆騰阿見擬馳赴冀
州擇要扼紮並派成惠營帶馬隊駐紮衡水所籌尙妥著卽督飭
所部各隊確探賊蹤分投截剿以遏其北竄之路該匪紛擾各處
究有幾股劉長佑出省追剿見抵何處均著隨時具奏並著嚴檄
劉景芳等攔頭迎擊一面會同崇厚穆騰阿派出將士相機合剿
直省官兵與穆騰阿所部如遇出隊進剿及各路賊情務當彼此
知照庶可聲息相通迅殲醜類至直隸地方近遭荒歉各州縣村
鎮又復罷市居奇官兵過境覓食住宿甚屬不易著劉長佑按照

神機營原奏於京兵經過處所責成該管地方道府隨隊照料以利軍行神機營及穆騰阿原奏著鈔給閱看將此由五百里各諭令知之○諭都興阿奏匪徒勾結木犯闖入孤山商令大員前往督辦一摺孤山爲匪徒屢次竄伏之地都興阿於五行隊撤回後派委協領毓昌前往防堵該協領狃於玩泄致該匪與木犯土匪暗行勾結竄撲孤山該協領復督戰不力遇賊卽退種種貽誤殊堪痛恨佐領春鐸於木簞下運之際託病不追實屬畏葸毓昌春鐸均著卽行革職不准畱營並不准藉詞率請開復都興阿調度乖方有負委任著交部議處該將軍見派德音泰帶兵會同依勒通阿及富和等軍分路進剿並咨行奕榕前往督辦卽著迅催各軍星速前進剋期會剿毋得參差延誤致賊匪又成燎原之勢奕榕計已由省啟程並著趕緊到營督飭剿辦德音泰等各將弁如

有逗留畏縮不遵調遣者卽由奕榕照軍法從事務將此股賊匪首從悉數殲除儻使日久稽誅滋蔓爲患惟都興阿等是問將此由六百里各諭令知之○諭丁寶楨奏派軍協守淮西添募新營進剿豫軍擊退捷牆逆匪並土匪竄擾蘭境爲官軍擊敗摺片任賴等逆撲犯新河口隄牆經宋慶等軍擊退見在該逆向北奔突距下營處僅三四十里難保不乘隙搶渡著丁寶楨嚴飭在防各軍認真堵禦遇賊卽擊毋令竄逸該撫添募步隊九營馬勇五百名卽趕緊訓練相機調遣以便騰出防兵過河進剿李鴻章前奏由濟南貴州前進務當迅速進行親赴前敵妥爲調度丁寶楨奏邳州等處匪徒高歸等聚眾滋事與張之萬前奏大略相同該匪見竄邳境之堰頭一帶沂屬與江境毗連各州縣向多伏莽深恐互相勾結亟應及早殄滅著張之萬丁寶楨督飭各軍會同皖省

官軍協力勦辦迅殲醜類務絕根株將此由六百里各諭令知之
(一)諭成祿奏官軍截奪賊糧獲勝見擬移營市圍一摺肅州賊匪
偷越城南金佛寺一帶擄掠糧草成祿所派各營於新墩子灘地
將護糧悍賊數百擊斃奪獲賊糧甚夥該逆食盡援絕機有可乘
正當實力圍攻以圖迅拔著成祿親督各營剋期進偏不准再有
稽延所請飭穆圖善酌撥數營助剿之處著穆圖善酌量妥籌成
祿亦不得藉詞延待該提督圍攻肅州爲日已久前請將王仁和
黃祖淦兩軍統歸節制可將肅城圍困周而並稱關外及哈密各
處均可兼顧此時又以合圍難周成功莫必兩軍皆難得力等詞
嘵嘵推諉是何居心朝廷洞見肺肝豈能任該提督一意反覆貽
誤軍事耶若再不振刷精神徒以頓兵堅城爲延緩出關之計圖
法具在不能再爲該提督曲從末減也懷之將此由六百里各諭

令知之○諭前因榮全奏籌畫安插索倫等眾當諭令該參贊於
接出後令在科城暫住再行酌量請旨茲據奎昌等奏稱科布多
所屬各旗戶口日繁遊牧狹窄又兼近年亢旱成災疫氣流行牲
畜倒斃人多凍餒實無閒地安插索倫人眾請飭榮全另籌妥策
等語奎昌等所奏雖係實在情形惟此項人眾若非籌給牧地令
其暫行棲止必致淪落堪虞仍著麟興榮全錦丕勒多爾濟奎昌
明珠在烏科兩城暫爲設法安插俾該索倫人眾到時得有棲身
再另行會籌善策妥速奏聞以爲永遠安插之計李雲麟當與麟
興等悉心會商擇地安置毋令該人眾流離失所將此由五百里
各諭令知之○廣廣西鄉試中額二名○賞京師外城煮賑各廠
每月粟米二百七十石○丁丑工部左侍郎魁齡等奏櫻桃滿舊
有橋座應如何設法改修請派員查勘得旨此項工程毋庸派員

查勘卽由魁齡等一併賠修○己卯諭內閣丁寶楨奏捻逆由北路偷撲濰河全股回竄調兵追剿一摺捻逆盤踞山東萊陽等境經李鴻章丁寶楨調集各省兵勇沿河築牆堵禦朝廷以河牆本不可恃疊諭李鴻章親赴前敵防剿兼施以期會合東軍殲除巨患茲據丁寶楨奏稱本月二十日該匪全股由海神廟等處撲犯濰河官軍馳往迎擊逆匪數萬拌死搶撲鏖戰良久旋因眾寡不敵被匪竄渡覽奏殊深憤懣李鴻章總統諸軍未能先事豫防又未迅赴前敵妥籌堵禦以致逆匪竄渡實難辭咎著交部議處山東布政使潘鼎新帶隊堵剿未能得力著一併交部議處山東巡撫丁寶楨在防守禦未能調集各軍嚴密扼截致賊飽颺糜餉殃民厥咎尤重著卽革職畱任並摘去頂帶仍責令該大臣等督率兵勇實力追剿毋任蔓延以贖前愆毋謂寬典可再邀也懍之○

諭軍機大臣等捻股初竄登萊時卽經諭令李鴻章調集各路將士蹙諸海隅復慮海軍漸集丁寶楨呼應不靈疊經諭令李鴻章馳赴前敵親臨調度乃該大臣始終遷延既未能厚集兵力迅速派往又未能趕緊親臨調度以致潘鼎新分防汛地屢次改移貽誤全局盡棄前功深堪痛恨運黃兩防旣經李鴻章籌布嚴密善卽嚴檄各路防兵分投扼守並著曾國藩張之萬劉長佑崇厚英翰李鶴年各飭所派防軍認真守禦賊由何路竄出卽治何路將領以失律之罪濟南省城著丁寶楨趕緊防守張秋齊河以東黃防最關緊要劉長佑崇厚當加意嚴防宿遷以下六塘河防亦未周密轉瞬秋深水落河牆尙未完築深屬可虞浙省所派兵勇尙未報入江境著曾國藩張之萬迅速添兵堵遏並嚴催浙軍星馳到防譚仁芳劉維楨等軍著李瀚章曾國荃迅飭赴東李鴻章一

面迎提以資厚集並著李鴻章丁寶楨檄催前敵各營視賊所向
儘力窮追就地殲除以贖前愆儻再任竄出東境蔓延他省自問
當得何罪潘鼎新布置乖方致賊回竄厥咎甚重如再不能得力
卽著李鴻章嚴參治罪丁寶楨另片奏勦捕梟匪情形此股匪徒
奔突靡定黃防諸軍爲所牽掣著劉長佑崇厚迅將此股殄除並
隨時知照穆騰阿會同勦洗先清畿輔內患丁寶楨仍當嚴飭東
省文武合力會剿以靖地方不得但以堵截出境爲了事將此由
六百里各諭令知之○諭本年五月間捻逆由山東戴廟竄渡運
河據丁寶楨奏稱王心安等視賊眾我寡卽行收隊請將王心安
先行革職交部從重議罪當因事起倉卒或實係賊眾兵單情尙
可原是以加恩僅將王心安革職暫免治罪仍畱營效力以觀後
效此次復據丁寶楨奏稱捻逆竄出膠萊河牆又於王心安所分

地段猛撲王心安因眾寡不敵無從扼擊等語前後貽誤情形殊堪髮指王心安以一武弁擢保總兵恩遇不爲不優乃兩次捻眾均由該革員所分地段竄越以致全局潰敗實屬罪無可追著李鴻章嚴密派員將王心安拏解軍前正法以昭炯戒毋得稍露風聲令其逃逸將此密諭知之○庚辰以蘇鳳文署廣西巡撫由布政使署○以王凱泰爲廣東布政使蔣志章爲浙江按察使前四川按察使○廣直隸鄉試中額二名○是月豁免湖南晃州廳被擾上年民欠錢糧展緩廣東新興等七縣被水被擾節年未完額賦

八月辛巳朔諭軍機大臣等劉長佑奏剿匪連次獲勝見飭兵勇夾擊並沿途分布防軍情形一摺梟匪奔竄直隸威縣曲周及山東邱縣館陶等處疊經直東各軍追擊均有斬擒惟各軍因高粱茂密橫潦載道未能儘力窮追該匪復乘間遠逸劉長佑見查勘

渾沱河一帶形勢並派總兵劉景芳分撥練兵畱駐河閒景州等處飭余承恩等分途進攻所轄尚屬周而著卽嚴檄余承恩等迅率所部躡蹤追剿毋稍延玩穆騰阿前報駐紮冀州與劉長佑相去不遠務將軍情賊情隨時互相知照以期妥籌辦法迅殄逆氛如該督相去較遠所有直隸各軍著穆騰阿就近調派並著該督飭知在營各將士遵照辦理此次劉雲鶴陣亡帶隊各員并有無救援不力退縮貽誤之處著劉長佑查明嚴參向來各營兵勇每有尾賊擄掠或利賊所遺輜重致稽追剿各情事積習相沿深堪痛恨見在直省旱後被賊百姓已極困苦若再加兵勇騷擾必致民不聊生著劉長佑穆騰阿加意訪查如有前項情弊卽行從嚴懲辦以肅軍律將此由五百里各諭令知之○諭英翰奏運防布置已定擬派隊會剿一摺登萊竄匪昨據丁寶楨奏報業已竄過

淮河扼守膠萊之策竟成畫餅李鴻章等遷延縱賊貽誤非輕黃
運兩防雖疊據該大臣等奏稱分布穩固若盡如前敵各軍恐亦
未可深恃賊在登萊旣已遂其飽掠此番全股出犯其氣正銳儻
令逸出東境大局殊不堪設想李鴻章自督辦以來曾未稍挫賊
鋒糜餉殃民其咎甚重此時惟當趕緊抽調各軍分路兜擊迅圖
剿洗以贖前愆丁寶楨亦當嚴飭兵勇協力殲除黃運防軍並著
李鴻章等嚴行檄飭晝夜密防儻有流失卽將該將弁立時正法
並將該大臣等從重治罪英翰擬派萬人助剿卽著迅飭啟程皖
軍悉數出征本境防務亦關緊要英翰回潁後仍當統籌全局激
勵紳團嚴防竄越另片奏剿辦邵宿土匪情形此股匪徒見雖竄
匿無蹤若不芟刈根株必致養癰貽患更恐其與捻逆勾結著曾
國藩張之萬丁寶楨等責成邵嶧一帶各地方官認真捕拏毋令

營弁飾詞以報功地方官縱差以庇匪務將著名首從各逆擒獲正法是爲至要鮑超所部霆勇前曾諭令曾國藩等分別撤留交婁雲慶統帶見在婁雲慶是否到營該部眾應否遣撤尙未據曾國藩等覆奏霆營兵勇向稱駁雜甫易統帥心志更恐不齊曾國藩李鴻章李瀚章曾國荃務當體察情形妥爲安置毋令再蹈上年該營覆轍本日據馬新貽奏已派水陸各營於七月中旬啟程赴淮徐聽調卽著李鴻章飛速迎提以資厚集該逆見竄何處官兵能否得力著該大臣隨時迅奏毋稍稽延將此由六百里各諭令知之○予山東陣亡總兵官劉雲鶴祭葬世職○壬午李鴻章奏臣於七月二十二日由濟甯州督隊進發二十六日馳抵濟南忽接東軍道員王成謙稟稱二十日辰刻捻逆全股由海神廟以北十數里外海灘撲渡濰河王心安率四營馳往堵剿力戰陣亡

營官胡勝祖一員哨弁七八員勇丁六七百名王成謙得信馳援賊已搶渡過河向西南狂奔王成謙卽拔營追賊等情潘鼎新劉銘傳二十一日聞信董鳳高王永勝沈宏富二十二日聞信先後均拔全隊緊躡而西水師提督徐道奎稟稱在昌邑姜家集遇賊擊退二十一日該逆竄至濰縣二十二日潘鼎新王成謙追抵濰縣賊竄昌樂東南鄉二十三日分股南竄其勢將趨東境之沂莒蘇境之贛榆青口查濰河深淺不等水約五六尺冀可支持旬日以待臣軍續至再行勻布不意賊匪搶渡如此之速其濰河海神廟以北地方係東軍王心安駐守據王成謙稟稱該革鎮甫經築營眾寡不敵似亦實情想丁寶楨必已奏參臣忝任督師中途聞報愧憤交集應請旨將臣交部議處臣初意膠萊河防難成專重運防嗣聞膠防漸有頭緒是運防輕而膠防重先抽宋慶王永勝

萬餘人前去今又調劉秉璋周盛波萬餘人偕行運防乃愈抽愈空賊既南趨青口必圖猛撲運河膠萊各軍及臣部均落賊後若賊眾猛撲竟無把握臣卽日督同劉秉璋周盛波由濟南改道徑赴泰安沂州一帶就近察度賊蹤督飭各軍分投堵剿並察下游運防空虛之處酌量添兵協守未知能否趕及殊深焦慮上諭軍機大臣等捻匪由海神廟撲渡濰河全股回竄該處本係潘鼎新認守地段李鴻章於該藩司布置疏略未能早行籌備致誤全局深堪痛恨河防本不可恃朝廷屢申儆戒該大臣至此始以竟無把握入奏不知兩月以來籌辦何事此時賊已南趨該大臣始由濟南改道赴泰安沂郡堵剿其勢又落賊後若不督催諸軍星夜兼程繞向賊前分投堵截勢將何所底止該大臣當振刷精神力圖自贖不得仍前玩忽坐誤事機懷之將此由六百里諭令知

之○左宗棠趙長齡奏臣宗棠抵潼關與臬司陳湜晤商河防據陳湜聲稱西路上自保德州起下至龍門口止計程千數百里原係營兵團勇散布分防實不足恃一交冬令冰橋凝結全資陸軍憑岸堵截乃可無虞其保德河曲迤北邊外河岸地屬綏遠歸化轄地非內地防軍所能兼顧其龍門迤南至蒲州風陵渡一帶水陸兼防似尙周妥見已加製礮船四十安置下游垣曲一帶儻再於三門以上增設礮船數十號分布西南沿河庶山西內地河防一律鞏固臣等察陳湜所陳河防情形至爲詳盡山西幅隕南北長而東西狹就全境河防而言應分爲三段一自歸綏所轄起至河曲縣保德州止爲西北岸一自河曲保德起至蒲州附郭永濟縣境止爲西岸一自永濟起至垣曲止爲南岸就三段而言西岸較南岸爲尤重陳湜以水陸數千之軍自禹門以下節節設防惟

自禹門以上河狹

非

多山西弁兵鮮經戰陣團勇尤不足恃應由

陳湜於見在防營五千人內酌留數營防守西岸迤南及南岸一

帶再派弁回南增募勁卒三千人派赴禹門以上設防至保德河

曲地境而止其保德河曲河岸並賁成大同鎮總兵馬陞就近派

該標將弁兵丁協防歸陳湜節制陳湜應於汾州一帶擇地駐紮

居中調度策應其南岸垣曲以下接河南界若河南亦倣造礮船

百餘號自濟源境起延紮至直隸界上與山西水師相連下與直

隸水師通氣則兩省均得其益可否仰懇 天恩飭下河南撫臣

速製礮船一律設防之處自出 聖裁 上諭山西河防經左宗

棠行抵潼關與陳湜晤商籌畫分段設防情形尙爲詳盡惟地段

綏長必須擇要扼堵水陸相依方足以昭嚴密著該大臣傳知陳

湜悉心經理力保晉疆不可稍涉疏懈一應增兵籌防各事宜均

著照該大臣等所議辦理其保德河曲河岸卽責成馬陞就近派該標將弁兵丁協防歸陳湜節制並著飭令陳湜於汾州一帶擇地駐紮居中調度策應凡屬內地文武兵勇概歸陳湜節制調遣如月粉飾疏忽抗玩軍令者卽由陳湜稟知左宗棠趙長齡從嚴參奏南岸垣曲以下界接河南著李鶴年仿造礮船百餘號選派員弁駕駛自濟源境起延紮至直隸界上與山西水師相連節節布置以期周密至山西增募勇丁月餉及船礮軍裝一切製造之費著趙長齡責成署藩司胡大任籌款舉辦毋誤事機保德河曲以抵西北邊外薩拉齊廳一帶河岸漢蒙回商民雜處防範宜周前因甘肅回民有赴歸化購買馬匹軍裝偽造文書護照情事當經諭令裕瑞桂成一體仿範著該將軍等懷遵前奉諭旨實力督辦所有在防各鎮道等均歸該將軍節制以一事權將此由五百

里諭令知之○以翁同爵爲四川按察使

由湖南鹽法長寶道遷

○癸未諭

軍機大臣等據都察院奏山東貢生張垚等聯名以賊踞登萊情急求救等詞赴該衙門呈訴所稱官軍追賊至萊兩月有餘未聞接仗賊勢日大民生日蹙等情自係爲受害甚深情急呼籲起見捻逆自渡運東竄丁寶楨帶兵尾追疊報勝仗若如張垚等所稱賊到任其荼毒賊過被兵擄害是東省兵勇剿賊不足害之有餘初不料各營兵勇漫無紀律至此李鴻章總統師于駐東已久於東省兵勇剿賊情形自當確有見聞乃竟毫無覺察但事遷延使東境數十萬生靈厄於賊復厄於兵該大臣爲國家柱石縱賊殃民至於此極捫心清夜何以自安見在賊已飽颺南去築牆困賊之說已成薑餅李鴻章又謂運防毫無把握是賊勢必致縱橫自如到處蹂躪該大臣既膺重任宜如何激發天良力籌兜勦之方

爲朝廷翦除巨患若徒藉口於流賊難制爲回護地步大臣所爲固如是乎著卽檄飭各軍迅速追剿誓期滅賊以贖前愆毋再仍前泄省自干重咎丁寶楨旣不能實力防剿又任令兵勇騷擾藉口賊眾兵單希圖掩飾負罪已深膠萊河防之兵旣追賊而西著李鴻章等卽迅飭全軍奮力追賊儻各路帶兵之員尙有稍涉畏縮及不能約束兵丁者卽以軍法從事如敢仍前玩縱一經訪聞或別經告發必坐該大臣等以徇庇之罪懷之戒之原呈均著鈔給閱看將此由四百里各諭令知之○諭穆騰阿奏探明賊蹤進剿劉長佑奏追截竄匪疊勝並商辦會剿情形各一摺匪股見尙聚有千數百人劉長佑屢次奏報僅止數百人見在劉雲鶴等剿賊陣亡後各軍疊獲勝仗而賊復能分竄足見人數尙多劉長佑不得輕聽屬員諱飾當與穆騰阿卽分督所部互相策應以期四

面兜剿迅速就地殄盡不得再事遲緩此股匪徒聚則爲賊散則爲民窩藏潛匿稽查非易劉長佑須督飭地方設法嚴搜以清其源毋爲牧令蒙蔽至兵勇騷擾地方劉長佑穆騰阿均有統率之責尤當遵奉前諭嚴行查辦以肅軍律而慰民心將此由五百里各諭令知之○甲申諭軍機大臣等丁寶楨奏捻逆奔竄沂莒一路勢趨青口見督各軍分路追剿並籌辦防務各摺片捻逆由濰縣竄安邱高密所屬之景芝鎮等處旋竄西南沂水以撲青口其擾莒州一股經官軍擊退見竄距州城九十里馬奇山一帶亦係往青口之道丁寶楨見派道員王成謙由沂水前進親督王正起等由沂州府扼紮卽著嚴檄各軍視賊所向痛剿逆氛毋再一味粉飾徒爲紙上空談任賊蔓延致干重咎李鴻章專辦剿捻事宜責無旁貸務當親臨前敵與丁寶楨迅籌殄滅之方以贖前愆

該逆見已逸出河牆若再就千里縣亘之運河爲四面困逼之計不但無此兵力且該逆雖愚斷無再入膠萊之理至黃河毗連直東幾及千里瞬交冬令水落水合之處可以偷起尤應嚴密布置不可稍涉疏虞李鴻章儻再因循坐誤於各路毫無布置縱寇殃民貽害地方恐該大臣不能當此重咎也懷之將此由六百里各諭令知之○諭左宗棠等奏官軍剿擒疊勝並回逆同時內犯各軍分道追擊退及見籌辦情形一摺擒逆盤旋渭北經劉松山等軍分道追擊一敗之於昌甯村再敗之於張家廟賊鋒大挫其竄至三原之賊又經劉效忠擊敗由高陵一帶東竄左宗棠見令劉松山由富平前進易尾追爲頭迎並飭劉端冕由藍田進駐臨潼與華州各營憑渭扼賊均能洞見賊情著卽會同庫克吉泰喬松年督飭劉松山高連陞等乘此聲威合力兜剿迅掃狂氛該逆意

圖南渡應如何規賊扼擊之處並著隨時布置回逆土匪乘隙肆
擾實以撓亂官軍著檄飭譚王龍劉厚基各軍於宜君甘泉等處
加意防範毋得稍涉疏虞致剿捻各軍爲賊所掣盤屋郢縣一帶
及寶雞各峪口該大臣等務當先事嚴防以遏旁竄延榆綏各屬
爲回匪出沒之所防務實關緊要前據穆圖善奏賊撲延安郡城
經總兵胡世英督隊進剿斃匪甚多茲據左宗棠等奏稱保安安
塞告急時胡世英並未派兵往援等語是前次勝仗該總兵顯有
捏報情事著穆圖善按照左宗棠所奏據實查明奏參毋許瞻徇
以後該處軍情該署督等務須互相知照以杜弊端左宗棠等原
片著鈔給穆圖善閱看將此由六百里各諭令知之○乙酉諭軍
機大臣等本年三月二十五日據楊岳斌奏稱貴德廳回匪叛亂
將同知承順及家屬戕害踞守廳城倡脅官民書寫官偏民變等

詞捏稟王通已飭鄧全忠等督勇率團設法進剿於四月二十七日奏到當經諭令楊岳斌卽飭鄧全忠等迅將貴德廳城攻拔王通亦當嚴密防守毋再輕信奸回致爲所誤本日接閱王通四月十一日奏報回眾變亂戕官劫庫等情與楊岳斌前次所奏尙屬相同是同匪之甘心爲逆萬難寬貸王通一意主撫已誤於前此時尙不省悟另片奏鄧全忠等來甯進剿有礙撫局實屬偏執已見就目前情形而論鄧全忠等既經收復米拉三溝能否督率所部先抵西甯入城鎮撫再將貴德廳城相機攻取著穆圖善妥籌辦理回逆聚眾擾亂固不可不懾以兵威但兵勇進剿之時往往妄行殺戮乘機搶掠致良回無以自存朝廷辦理回務止分良莠並不使其玉石俱焚左宗棠穆圖善務當飭知帶兵各員隨時約束兵勇毋得濫及無辜良回旣安辦理自易爲力楊岳斌前奏參

頂厄魯特人眾改爲該喇嘛門徒果能如李雲麟所奏不至泛濫無定內偏科境可爲烏科兩城屏障亦可相機辦理惟此節關繫甚重不可不妥慎籌畫李雲麟所陳究竟是否可行著麟興錦巴勒多爾濟榮全奎昌明瑤會議具奏李雲麟又稱撤塔城額官一節亦今日必不可緩之事以既存塔城之官則欲改厄魯特爲該喇嘛門徒必致扞格不行等語是否有當並著麟興等一併會議奏聞李雲麟因病陳請休職回旗見在安插厄魯特善後事宜已於另摺批令會同麟興等妥籌具奏著俟李雲麟等奏到時再降諭旨將此由六百里各諭令知之○予甘肅陣亡遊擊劉魁福等祭葬世職並江蘇陣亡知縣章惠建祠○己丑諭軍機大臣等穆騰阿奏馳抵武強確探匪蹤進剿一摺梟匪自奔入無極後蹤迹飄忽竄向靡定穆騰阿恐該匪復向東北河間任邱一帶甚關緊

要自應分投堵截見在劉景芳一軍已赴饒陽一帶防剿穆騰阿暫紮武強確探進剿惟賊匪既有圖竄東北之勢穆騰阿當督率所部各營嚴密堵禦以遏該逆北竄之路劉長佑卽飭派出各軍將賊匪向南兜擊痛加剿洗不得任令回竄該督等均當隨時知照毋失機宜穆騰阿另摺奏請將副都統成惠等懲辦等語成惠支領官兵餉銀僅放半月因保英解餉未到擅向沿途州縣那借實屬任意妄爲雖經歸還亦難辭咎成惠著交部嚴加議處飭令回旗聽候部議所部馬隊卽著交阿克敦暫行管帶空花翎保英押解餉銀軍火沿途逗畱著卽革職回旗營總莫爾廣額並不早爲呈報亦屬不合著革職畱營以示懲儆將此由五百里各諭令知之○諭張之萬奏捻逆擾及贛榆見籌堵禦各摺片昨據丁寶楨奏賊竄贛榆青口情形已令曾國藩張之萬亟籌扼擊固襄下

河完善之區茲覽張之萬所奏贛榆沈陽各隘僅有參將王得勝等千數百人駐守姚廣武張從龍各營分紮仰化集王營等處曾國藩見調之王可陞五營分布淮東爲裏下河屏蔽勢難激令北來是該處情形甚形喫緊清淮兵力本極單薄若賊肆意南趨必致江北完善之地遽遭蹂躪關繫實非淺鮮著曾國藩妥籌兼顧或添撥勁旅以資扼截毋任蔓延李鴻章迅檄浙軍趕緊到防以便騰出張從龍等營迎頭截剿並卽飭令劉銘傳等軍緊躡賊蹤會同夾擊毋再步步落後張之萬所請飭令開奇鳳三軍迎擊跟追之處並著李鴻章斟酌調派以資厚集六塘河爲清淮屏蔽張之萬務當就見有兵力嚴密堵禦毋稍疏虞將此由六百里各諭令知之○盛京將軍都興阿奏探明東省捻匪被官兵遏截後路所有奉天濱海各城一體遴派馬隊官兵豫籌嚴防得旨登萊近

無賊蹤濱海處所毋庸另籌設防見在大孤山等處匪徒滋擾該將軍當嚴飭派出各兵及所屬各州縣認真堵剿以靖地方○庚寅諭內閣前因太常寺卿石贊清奏條陳黔省剿撫事宜當經諭令軍機大臣會同大學士九卿妥議具奏茲據該大臣等會議奏稱四川省事務殷繁原設總督一人立法本極周密近年秦隴滇黔不靖該省東南北三面防剿已非尋常無事之時且黔省上游剿匪軍火餉精等項均由該省兼籌若再責四川總督駱秉章兼督滇黔事務深恐有顧此失彼之處於大局轉多窒礙該京卿所請援照鄂爾泰成案令駱秉章總制川滇黔三省之處著毋庸議見在黔西大定一帶道路已通卽著劉嶽昭趕緊赴滇以資鎮撫所部援軍應否畱黔協剿之處並著駱秉章劉嶽昭會商辦理李元度等軍及果後各營均在黔境黔省吉忠字各營兵力亦不甚

薄駱秉章劉崐張亮基當督飭各軍會合剿擊所請由四川湖南配兵分鈔思南遵義等處一節亦毋庸議提督周達武等各員著該督撫等酌量差遣趙德光所部著張亮基妥爲調用以固黔垣該軍餉糈除四川湖南協濟外張亮基仍當隨時籌撥至黔省月餉疊經戶部議定數目奏請飭催四川湖南湖北廣東各省督撫措解著駱秉章李瀚章劉崐曾國荃瑞麟蔣益澧按照部定銀數嚴飭各該藩司按月趕解如有延玩等情卽由該督撫等奏請議處黔省自用兵以來民困已極應如何慎重牧令舉辦屯田並勦撫兼用之處張亮基身任黔撫務當悉心妥辦用靖地方貴州學政黎培敬既據該京卿奏稱深得民心懇請量加簡用黎培敬著准其會同該省巡撫辦理勦撫屯田一切事宜並准其專摺奏事以順輿情○予湖北陣亡提督劉成秀等祭葬世職○辛卯諭軍

機大臣等崇厚奏賊匪回竄文安見籌防剿一摺賊匪由蠡縣高陽竄至文安縣屬之狼虎廟距津郡僅百餘里該郡練軍多調赴外出本地兵力空虛崇厚見派由奉省撤回之洋槍隊並各營存兵憑守濠牆尙恐不敷分途迎剿著劉長佑穆騰阿督飭各軍實力追剿與崇厚所派各軍夾擊迅掃賊氛劉長佑穆騰阿所部兵力不爲不厚乃任令賊騎竄逸毫無攔截若再不盡力剿洗聽其東奔西突縱橫自如將來伊於胡底此股賊騎爲數尙不甚多崇厚亦當督軍出擊不得但守濠牆致令居民驚疑遷徙將此由五百里各諭令知之○壬辰諭軍機大臣等都興阿奏剿辦孤山賊匪獲勝及搜剿法庫地方盜匪情形延煦等奏酌擬進山查勘事宜請帶恩合同往各摺片孤山賊匪經依勒通阿等追及於那家店地方迎剿獲勝匪眾登山逃竄復經德音泰等扼之於乾柴嶺

先後擒斬四十餘名餘匪逃竄無多正當乘此聲勢將此賊盡數殲除英榕計抵孤山著卽調撥各隊督同地方官分道堵截務將逸匪按名拏獲毋任逃匿並將查辦木匪情形隨時與都興阿商酌相機辦理法庫爲通邊大道該處竟有賊匪時出搶劫雖經沙克都林扎布擒斬多名仍著都興阿飭令該侍衛將逸犯搜捕淨盡以靖地方至游民墾荒一案關繫甚重必須詳細查究方無流弊延煦等見擬進山查勘卽著將應辦事宜悉心籌畫毋得敷衍了事所刊木質關防著准其開用其隨帶委員書役及延煦等應領資斧均准於船規項下開支實用實銷毋得冒濫此次帶同前往之員務擇明練事體並結實可靠者藉資臂助儻委員中營私舞弊延煦等當從重參辦如其辦有成效亦准酌量保奏以示鼓勵恩合既熟悉邊外情形著准延煦等帶往都興阿與延煦等同

辦一事延煦等此次具奏摺件都興阿何以未經會銜著據實覆奏將此由五百里各諭令知之尋都興阿奏延煦等奏帶已革將軍恩合前往因其開墾廣甯官荒委員舞弊一案正在查辦虛實未定未便列銜亦未便阻止報聞○甲午李鴻章奏臣於八月初一日在泰安途次接據總兵董鳳高稟稱七月二十六日督馬步七營將抵莒州探知賊騎闖過卽帶隊鈔出賊前派馬隊於秫叢中埋伏賊馬纔擁來撲我軍俟其逼近開放槍礮賊墜馬者甚多擒斬百餘名二十七日黎明分路進躡莒州南門外有馬賊萬餘西來當卽分投迎擊步賊又四面圍裹經總兵魏興發開放劈山礮斃賊數十名各營槍礮環擊賊仍拌命衝突營官董學友等奮力抵殺吳鳳柱又帶馬隊攔腰橫擊逆股散而復聚有騎馬賊酋數十督陣最猛經王芝生突入砍倒三名董鳳高親督血戰兩時

之久賊勢大挫各營追殺二十餘里斃賊數百生擒一百三十餘名等情查董鳳高人數極單以少勝眾實屬異常出力是日陣亡儘先都司駱得標守備宋朝喜千總黃正科外委孫魁元均請旨飭部從優議卹賊被創後於初二日竄及日照嶺榆境內臣因運防兵單先令董鳳高王永勝等各帶所部由沂州馳回臺莊灘上一帶協助守河見已到防並飭劉銘傳統率大隊緊追兜剿劉銘傳同豫軍宋慶追抵郟城臣因張曜稟報戴廟至靳口兵力不敷飛飭宋慶帶隊折回運河原防劉銘傳由郟城取道海州桃林沙河向青口兜剿日內計已接仗臣又飭周盛傳潘鼎新並進祁宿一帶相機會擊臣於初八日行抵沂州卽督同劉秉璋等馬步隊進駐東蘇運河交界之臺莊就近調度初七八日探聞賊已由青口西北竄郟蘭境內本日又折而南趨必係窺探運防查蘇境

運河自宿遷仰化集以下至桃源清淮二百餘里尙無長牆兵力恐不可恃臣所調浙軍甫過揚州或爲清淮稍助聲援臣抵盭莊後再行酌量分隊繞過運西前往協守 上諭軍機大臣等捻匪自南甯贛榆青口一帶復由青口西北竄鄭蘭境內又折而南趨必係窺撲運防蘇境運河自宿遷仰化集至桃源清淮二百餘里尙無長牆六塘河水勢充足兵力亦不可恃李鴻章已分派各軍前護運防並擬親駐臺莊就近調度賊匪渡過膠萊河縱橫紛竄自應設法兜剿迅圖剪滅此時若能扼之河干就地殄除固屬勝算該大臣曾奏運防斷無把握儻泥於前說將得力之兵分赴河防勢必任賊肆竄竟無剿擊之師河道地方遼闊設防本自不易秋後水落更無可恃賊果一意渡運難保必能堵截該大臣總領師干必能統籌全局力圖滅賊之策何得隨時敷衍冀圖塞責著

李鴻章審度賊情視其所向迅派得力之師實力扼剿以期迅速
肅事前因都察院奏兵勇騷擾地方最爲民害當經諭令該大臣
查明帶兵之員不能約束兵丁者卽以軍法從事兵勇剿賊不足
擾民有餘實爲近來大弊著懷遵前旨隨時查察遇犯必懲以飭
戎行賊若渡運而南江皖豫三省必致任其所之見在各省之兵
檄調遠出本境空虛可慮著該大臣實力籌畫毋得觀此失彼曾
國藩張之萬英翰李鶴年均須早爲之備毋俟賊蹤突至猝不及
防浙軍已過揚州正可迎頭攔截著曾國藩迅催前進張之萬李
鴻章趕緊迎提催令北上以厚兵力毋任中途遲延丁寶楨職任
專圻賊在東境卽該撫地方之責著嚴檄各軍奮力剿賊以贖前
愆其帶兵各員有打仗不力擾害地方者卽著查明懲辦毋再顧
預從事貽誤戎機將此由六百里各諭令知之○諭張亮基奏

提督勦賊捐軀懇請賜卹並請飭周達武赴任一摺署貴州提督趙德光在貴州督軍勦賊疊著戰功茲因在安平境遇賊接仗猝被伏賊暗槍所中受傷陣亡被害慘烈覽奏殊堪憫惻本日已明降諭旨將該署提督優卹建祠矣該省勦匪喫緊卽著駱秉章迅飭周達武速赴新任以重職守趙德光新歿行陣難保該匪不乘虛窺伺省垣著張亮基督同暫署提督張文德拊循士卒將省防事宜妥爲布置毋稍疏懈其安平竄匪並著撥兵堵剿就地殲除該省需餉甚緊四川應解黔餉卽著駱秉章懷遵前旨照數源源撥解不得稍涉延緩其四川援黔官軍並著駱秉章檄飭帶兵各員妥籌助剿以厚兵力將此由六百里各諭令知之○予貴州安平陣亡署提督趙德光祭葬世職諡剛節於死事地方暨貴州省城並卽岱廳原籍建祠○乙未諭軍機大臣等崇厚奏派兵會剿

賊匪一摺梟匪前竄文安縣之狼虎廟經都司鄭明保由任邱帶隊回剿斃匪數名賊向南竄復經余承恩追擊殲擒數十名餘賊仍在大城一帶鄭明保已赴王家口截剿並經崇厚添派總兵王佐臣督帶洋槍隊馳往會剿著卽督飭該總兵等視賊所向實力追剿不得遷延觀望致誤戎機穆騰阿馬隊已抵大城卽督同直津各隊官兵痛加剿洗毋稍延緩並著劉長佑督飭余承恩等會合各軍四面兜擊毋任旁竄此股賊匪爲數無多派出官軍已屬不少何至任其東奔西突毫無攔阻總由帶兵各員畏縮不前漫無紀律所致劉長佑穆騰阿崇厚務當嚴飭各軍奮力合剿迅將此股就地殲除毋再任令遠逸如有帶隊不力之員卽著從嚴參辦將此由四百里各諭令知之○丙申諭軍機大臣等穆騰阿奏連日進剿賊匪情形及請獎出力員弁各摺片賊匪盤踞河間屬

之王直堡余承恩進剿小有斬馘該匪復竄文安縣屬之辛莊隆渠一帶官軍獲勝追剿雨後被其從後鈔襲以致管帶官塔奇哈陣亡將隊撤退經步隊接應始行將賊壓下是該逆尚未大受懲創而官軍已小有敗衄乃遽欲列敘戰功驟保將弁實屬鋪張所有此次保舉各員著暫行存記俟此股賊匪剿捕淨盡再行請獎見在該都統已帶馬隊馳抵文安著卽親督各隊及劉景芳等四面兜圍實力勦擊迅籌撲滅不得意存矜伐向來非緊要軍情不得擅發六百里加緊該都統於此次軍情遽用急遞殊屬不諳事體嗣後務當斟酌緩急辦理將此由五百里諭令知之○諭丁寶楨奏捻逆見竄邵宿擬赴嶧縣一帶以扼回竄一摺捻逆由青口贛榆竄及日照邊境疊經東軍勦截復由海州紛擾郟城並疾走邵宿一路丁寶楨見向蘭陵鎮前進如賊過臺莊卽在滕嶧一帶

迎扼如賊仍由邳境回竄沂屬卽由嶧境回剿所籌尙屬周密著
卽督飭王正起王飛熊等軍確探賊情相機剿擊以期繞出賊前
毋任該逆縱橫自如致官軍處處落後其王成謙一軍並著飭赴
沂州實力扼紮究沂與淮海毗連逆蹤飄忽靡定難保不沿運北
趨李鴻章當懷遵前旨檄令劉銘傳等軍覘賊所向乘機攔截不
得以分守運河轉滋貽誤東省兵力較薄該大臣仍當飭令各軍
與東運互相聯絡以壯聲援將此由六百里各諭令知之○山東
巡撫丁寶楨奏利津海口見難疏濬至一切防務已派總兵官趙
三元帶領礮船沿河梭巡復飭該地方官派撥丁役逐段防範報
聞○予直隸陣亡前鋒參領塔奇哈祭葬世職○丁酉諭軍機大
臣等劉嶽昭奏官軍進剿平遠苗匪疊勝並請飭岑毓英剿辦海
馬姑苗匪完竣後仍回曲靖宋延春奏迤西賊援大至滇軍暫時

退守各摺片平遠州牛場聖苗匪恃險抗拒疊經劉嶽昭派令提督謝景春等分路進剿均有斬擒該匪敗竄回巢復經總兵吳安康等率隊直前將其巢邊之月城攻破剿辦尙屬得手著卽檄飭謝景春等軍乘此聲威輪流環擊迅將堅巢攻拔以絕根株海馬姑苗匪日久稽誅劉嶽昭當迅飭岑毓英帶兵前進妥籌剿辦一俟此股辦清仍令該藩司同紫曲靖經理應辦事宜其迤南一帶並著飭知隨時辦理姚州鎮南等處前據宋延春奏報馬如龍等軍進剿疊勝茲據奏稱士卒染疫甚眾賊股直奔姚州合國安楊盛宗等退守大姚舊衙坪一帶馬如龍見亦因病回省是迤西一路逆倭復然自應迅圖進取著宋延春將各軍應領餉需設法籌撥並傳知馬如龍趕緊調理如病勢稍愈卽出省督率在事員弁兵勇併力攻剿毋墮前功見在滇事方亟劉嶽昭務當力籌兼顧

取道入滇督同宋延春等籌兵籌餉以挽全局將此由六百里諭知劉嶽昭並傳諭宋延春知之○諭宋延春奏滇省官軍停兵待餉請飭催各省協解一摺滇省馬如龍等軍進剿迤西正形得手因賊援大至官軍餉絀兵單復行退守該省入款不敷而馬如龍籌墊餉項爲數亦鉅各省協撥之款僅據浙江咨撥銀五萬兩廣東咨撥銀二萬兩尙未到滇外此更無撥解見在停兵待餉萬分緊迫若不迅籌接濟勢必飢軍坐困迤西賊勢益張滇事將何所底止著略秉章端麟蔣益澧馬新貽劉坤一劉崐李鶴年各將奉撥滇餉趕緊如數源源起解以濟要需毋再延緩將此由五百里各諭令知之○諭伊勒屯奏巴里坤西路賊情一摺烏魯木齊逆回與伊犁等處潰散兵勇打仗該逆疊次失利如此時大兵前進勦辦較易得手文麟威儀營頭起馬步軍一千八百名業已行抵

王門卽著文麟統率所部剋日赴哈相機進剿成祿一軍疊經嚴
催該提督迅速出關見在關外需兵甚亟著成祿懷遵疊次諭旨
迅將肅城攻克統帶兵勇趕緊出關毋再遲延干咎伊勒屯何琯
另奏駐哈兵勇口糧自本年二月起均係伯錫爾福晉捐辦惟逆
回數次蹂躪財物糧石劫掠殆盡見在口糧均歸無著請飭撥烏
城見存哈密餉銀等語著麟興榮全錦丕勒多爾濟將該城見存
哈密餉銀三萬兩解赴巴城以資接濟其所稱此項銀二萬兩仍
屬不敷支放請飭嗣後遇有解到新疆軍餉銀兩無論何款再爲
撥給銀數萬兩並據何琯奏請飭在於新疆軍餉內與哈密駐防
兵勇每月撥給銀數千兩著李雲麟麟興榮全錦丕勒多爾濟斟
酌緩急情形與伊勒屯何琯會商辦理前因巴城餉絀諭令自本
年正月爲始每月發給銀六千兩由各省解到新疆餉銀內提解

著裕瑞遵旨於各省解到後如數提出解交烏里雅蘇台轉撥巴城務期按月源源接濟毋令缺乏軍功孔才一營在巴城異常出力自難令其枵腹從事著李雲麟麟興榮全錦丕勒多爾濟於新疆軍餉內自本年三月起每月撥解孔才一營餉銀五百兩以拯飢軍巴城官員廉俸及各項公費久經無款支放亟應迅籌協濟並著李雲麟麟興榮全錦丕勒多爾濟除撥解巴城兵餉外每月再爲籌撥官員俸廩並營中各項公費銀二千兩俾供支給將此由五百里諭知李雲麟裕瑞麟興榮全錦丕勒多爾濟成祿文麟伊勒屯並傳諭何瑄知之○以雲南官軍攻克貴州豬拱箐賊巢出力賞布政使岑毓英頭品頂帶餘升敘開復有差○戊戌諭內閣前據詹事府少詹事景其濬奏參貴州開復道員鄧爾巽縱練殃民肆行貪酷張亮基徇情率行奏請開復請將鄧爾巽撤銷保

案永不敘用等語當經諭令嚴樹森確切查明具奏茲據嚴樹森奏稱鄧爾巽於署理遵義府綏陽縣時倡勒民捐不輸者以香炙背並添班卡勒捐設立木站籠致人死命河南沈邱縣知縣丁士選之父家不中貲因勒捐不遂一家五人均斃囹圄調任遵義縣知縣後將生員文新元勒捐押入站籠令其傾家以贖並信用劣紳縱練擾民以致楓香壩螺螄堰一帶地方激變從賊計任遵義綏陽兩邑弊政酷刑釀成大亂且屢冒軍功升任道府其署大定府篆兼署貴西道任內又激變民團追賊攻城時該員潛遁以致大定府城失陷等語似此種種貪酷肆虐殘民激成變端若僅照嚴樹森所請發往軍臺不足蔽辜開復道員鄧爾巽著拔去花翎撤銷勇號革職永不敘用從重發往新疆效力贖罪以示懲儆張亮基徇情率請開復亦難辭咎著交部議處○諭前因升任翰林

院侍讀學士景其潛奏參署貴州巡撫張亮基玩兵侵蝕縱暴殃民等款疊經諭令嚴樹森確切查明據實具奏茲據嚴樹森奏稱查明張亮基被參各款奏請議結等語此案張亮基於收過廣東四川湖南各款雖不至侵漁過半惟巡撫支發銀兩不盡由司局覈放而由內署存發是原參該署撫添設內糧臺之說實屬有因已革知縣王應昌在四川中江縣任內聲名狼籍經駱秉章奏參革職永不敘用張亮基帶往貴州附入城防保舉開復原官雖曾奏捐貲四千兩與原參餽送三千金之數微有不符惟以蠹政害民之員輒爲奏請開復亦有不合知府茹含章與張亮基次子張臚壽往還尤密久居優缺厚贄拜門雖無憑指證而張臚壽浪游招搖茹含章與撫署子弟交接均屬不知自愛知縣白振采原名白升本係張亮基家丁託名委員調赴貴州經張亮基優請獎勵

以致廝養賤役濫廁冠裳張亮基以封疆大吏不知振作竟有辦事羸率袒護劣員縱容子弟濫保家丁等情著交部嚴加議處先行開缺聽候部議同知直隸州知州王應昌道員張臚壽知府茹含章知縣白振采均著一併革職王應昌白振采二員並著永不敘用驅逐回籍以昭炯戒尋吏部議上張亮基應照溺職革職例革職從之○諭嚴樹森奏請開缺北上等語覽奏殊堪詫異嚴樹森係屢經獲咎之員疊蒙擢用上年簡授廣西按察使命往貴州查辦事件旋授貴州布政使乃沿途逗畱延不到省疊次藉詞巧飾且奉特旨交查事件並不親臨其地安坐鄰省卽行查覆向來亦無此體制又見貴州事務棘手亟思規避率行奏請開缺來京似此畏葸取巧實屬溺職孤恩若僅予罷斥轉得置身事外遂其私謀嚴樹森著卽行革職發往雲南交張凱嵩差遣委用○諭軍

機大臣等劉長佑奏官軍會剿獲勝見籌布置情形穆騰阿奏續探情形追剿分布並派隊彈壓文安大城各摺片該匪見已竄向西南任邱高陽一帶著劉長佑穆騰阿督飭保定河間兩軍並余承恩等跟蹤緊追務將此股速行殄滅以靖畿輔如匪蹤已渡滹沱迤南卽責成劉長佑酌派兵勇扼紮河干一面派隊沿河地方文武聯絡鄉團嚴密扼守毋任賊騎往來偷渡一面派隊分投追剿該督所稱京兵宜於堵截不宜南北奔走跟蹤追逐致褻威重等語所籌不爲無見此股賊蹤如已遠竄卽著穆騰阿回駐近畿一帶將所部京兵於大城文安任邱雄縣各屬擇要分駐扼紮詳細偵探儻遇賊匪回竄刻卽迎擊以恤兵力而養軍威劉長佑惟當嚴督直省兵勇專力追截仍酌撥數營隨同穆騰阿分布駐紮以資周密文安大城既有匪徒勾結梟匪情事卽著穆騰阿飭令派

往之阿克敦孝順就近彈壓劉長佑飭令地方官嚴密查拏靜海
滄州一帶著崇厚撥隊分紮堵剿毋稍疏忽將此由五百里各諭
令知之○諭前據張亮基奏報署貴州提督趙德光在安平剿匪
陣亡當經諭令駱秉章迅飭周達武赴任並令張亮基督同張文
德將省防事宜妥爲籌辦茲據嚴樹森奏稱探聞趙德光陣亡省
城人心震動安平賊勢益張更恐近省賊股何二強盜等匪乘勢
內逼貴陽勢甚危急請派員馳往剿辦等語所奏自係實在情形
黔省兵單餉絀省城附近一帶賊氛環伺見值趙德光新亡儻各
匪乘虛窺伺省垣益形喫重本日據嚴樹森奏查明張亮基被參
各款已降旨將張亮基開缺交部嚴議並有旨賞給曾璧光二品
頂帶署理貴州巡撫賞給黎培敬四品頂帶署理貴州布政使曾
璧光在黔有年自必熟悉地方情形卽著督同張文德等將省城

防守事宜妥爲布置該省撫經朝廷特簡務當振刷精神實力籌辦以期不負委任該省籌餉事宜卽責成黎培敬設法辦理前有旨令黎培敬會同巡撫辦理勦撫屯田事宜所有該省軍務著傳知該署藩司會同該署撫認真籌辦四川省月協黔餉五萬兩卽著駱秉章無論如何爲難迅提兩月餉銀剋期解往以後協餉仍著源源撥解黔省如此危急駱秉章豈容再分畛域飾詞推諉設令貴陽賊勢蔓延川省又豈能晏然無事耶其四川援黔官軍並著該督酌量抽撥勁旅馳往貴陽附近地方助剿以厚兵力將此由五百里各諭令知之○賞曾璧光二品頂帶署貴州巡撫由候補道黎培敬四品頂帶署貴州布政使由翰林院編修署○通諭各路統兵大臣約束官兵○己亥追予湖北殉難知縣師長治建祠弟安徽陣亡參將長鑣附祀○庚子廣湖北孝感縣學額一名○壬寅諭

軍機大臣等劉長佑奏剿捕梟匪獲勝情形一摺直隸官軍在蠡縣晉州等處剿捕梟匪疊獲勝仗並將匪首僧人左春信擒獲辦理尙屬認真見在殘匪僅百餘人向深澤無極奔竄著劉長佑飭令各軍乘勢追剿俾其晝夜不能喘息以期盡數殄除滹沱河防仍著該督遵奉前旨嚴密扼守遊擊王永勝知州陸邦燿剿賊奮勇殊堪嘉尙仍著劉長佑飭令認真防剿穆騰阿此時當已遵旨同防雄縣等處如賊回竄東北卽著該都統督飭防兵分路兜剿毋許一名漏網將此由六百里各諭令知之○諭張之萬奏捻股窺伺六塘河並竄撲河岸籌防堵擊情形暨添募勇丁請撥餉需各摺片捻股圍攻沈陽紛向贛榆鄭宿等處肆竄經劉銘傳牛師韓等敗之於贛榆鄭城境內姚廣武督飭沿河防軍將竄撲莊家灘等處賊匪擊退見在賊撲劉老澗沿河一帶人數眾多勢甚兇

猛著張之萬嚴督在防將士並派撥援軍實力堵遏毋任該逆搶渡並著李鴻章迅督追師星馳前往策應毋得仍前延誤六塘河水勢因宣洩過多淺處褻裳可涉能否於下游填遏以蓄水勢之處著張之萬斟酌情形辦理浙軍三千人業已到防尙不足敷分布該漕督擬添招馬步十營著卽趕緊募練成軍並著曾國藩每月撥解餉銀二萬兩迅籌接濟毋稍推諉清淮一帶兵力單弱朝廷時深顧慮李鴻章前駐濟甯辦理河防日久並未籌布周密此時若再不實力追剿一誤再誤伊於何底贛榆沭陽宿遷一帶與東省兗沂地界毗連相距咫尺丁寶楨駐軍沂州嶧縣等處亦當分兵出境與清淮防軍互相援應不得畫疆自守強分畛域至曾國藩李鴻章歷次奏稱採買戰馬爲數不下八千餘匹駝隻幾及千匹見在存營數目究有若干僧格林沁所部馬隊除裁撤外見

在存營馬隊官兵並馬匹數目若干將領出色者共若干員均著李鴻章詳細查明迅速覆奏將此由六百里各諭令知之○諭已革浙江處州鎮總兵陳國瑞前因患病回籍見在諒已病痊該員向在軍營打仗尙稱得力著李瀚章傳知陳國瑞令其赴部引見聽候錄用將此諭令知之○兵部左侍郎三口通商大臣崇厚奏據報梟匪南竄見撥隊分駐靜海以資堵剿得旨著飭靜海滄州各軍隨時偵探如有警信卽行帶隊剿捕以資策應○甲辰山東巡撫丁寶楨奏駐紮嶧縣距賊較遠察度見在賊情仍應暫駐沂州分軍布紮以便策應得旨著懷遵本月二十二日諭旨嚴飭各軍認真堵剿不得畫疆自守致誤戎機○乙巳諭軍機大臣等前據禮部接准朝鮮國王來咨轉奏當派恭親王會同大學士六部九卿議奏茲據奏稱游民墾荒有無窒礙該處情形無由懸揣請

飭都興阿等安立章程再行酌奪等語都興阿等奉派查勘此事
關係甚重該游民開墾之地東界朝鮮若不謀畫萬全殊失朝廷
字小之意該國王見已派員赴該地方聽候辦理著錦州副都統
奕格迅將剿匪事宜辦竣剋期會同延煦等帶領恩合進山查勘
就近與該國委員將地方情形通盤籌畫並與都興阿和衷商酌
以期中外兼籌永杜後患其如何籌辦之處著卽安立章程詳細
覆奏候旨定奪恭親王等原奏及朝鮮國王來咨均著鈔給閱看
本日都興阿額勒和布恩錫奏倡捐米石並酌減勸捐一摺奉省
採買粟米藉資賑務見在該處元氣未復若再勸捐輸恐滋擾累
非所以示體恤著卽行停止將此由四百里各諭令知之○諭英
翰奏回抵潁州力籌征軍糧餉並兼顧本境防務一摺據稱皖營
入東之軍派定步隊九千馬隊一千合成萬人令總兵程文炳統

帶隨地兜擊黃秉鈞等軍補守運防並遵旨兼顧本境仍駐潁州
督訪水陸防軍及地方紳團密探嚴防妥籌調度等語所籌甚是
卽著嚴檄程文炳黃秉鈞等確探賊蹤認真堵截並聯絡淮東各
軍以壯聲勢惟該省派出之軍新添洋槍開花礮等隊需費更鉅
英翰見飭藩司張兆棟於司庫先湊銀十萬兩並咨商曾國藩催
提江海關協餉及豫借鹽釐自應寬爲籌畫著曾國藩按照該撫
所商趕緊勻撥該督素顧大局諒能設法代籌接濟也英翰仍當
嚴飭該藩司將撥項星速報解以便各軍剋期啟程毋再遲緩捻
逆見聚邳宿一帶窺擾清淮於皖之泗潁各屬瞬息可至英翰務
令在事各軍擇要嚴防以杜侵越李鴻章亦當統籌全局相機兼
顧毋任該逆闖入皖疆益形延蔓將此由五百里各諭令知之○
丙午諭軍機大臣等穆騰阿奏梟匪已折竄任邱經穆騰阿督兵

進剿復向東面遠颺前據劉長佑奏稱賊趨無極深澤一帶何以折竄任邱如此之速且前稱賊匪僅百餘名何以仍未辦結任令肆擾著劉長佑嚴飭各軍將步隊嚴防要隘令馬隊迅速追剿並與穆騰阿防軍會同夾擊毋令喙息穆騰阿以任邱爲賊匪往來要路擬親督成章等馬步各隊駐紮該處並擬令薩凌阿分紮雄縣著卽照所請辦理劉景芳旣於文安等縣民情熟悉卽著劉長佑飭令該總兵督率所部分紮大城文安雄縣歸穆騰阿節制以資調遣該部統所稱任邱縣屬有匪徒勾結梟匪情形著劉長佑嚴飭該地方官乘有京兵駐紮該處設法密爲查拏以淨根株而絕延蔓將此由五百里各諭令知之○李鴻章奏臣欽奉密諭飭拏王心安正法又奉諭旨以山東貢生張垚等聯名呈訴東省兵勇剿賊不足害民有餘飭臣查辦臣查已革總兵王心安經前撫

臣閻敬銘派令帶勇分守運河戴廟一段臣於六月下旬巡閱河

防見該處北岸長牆重濠布置頗嚴若弁勇實力守禦何至倉卒
遽陷當據該處被害民人投遞聯名稟控均稱五月十二日賊至
河邊王心安所部未經拒戰槍礮無聲迫賊毀牆壘卽於朱萬美
營前過河焚掠等語臣復訪問東省官紳僉稱王心安平時剋扣
勇糧軍心離怨營規不整以致讓賊偷渡眾論藉藉似非無因王
心安戴廟失事時丁寶楨並不據實奏參猶爲飾陳戰狀臣以孤
軍逐賊與各督撫及各省主兵須和衷共濟未便輕有譏彈致生
嫌釁當賊竄過運河臣前摺但略陳東軍廢弛貽誤至濟甯後賊
竄青萊欲與丁寶楨劉銘傳等急圖膠萊河防臣軍力單不得不
求助東軍尤須開誠布公委曲聯絡惟聞東軍膠萊牆壘未堅勇
糧未放恐致誤事曾密函婉勸丁寶楨畱意詳查該撫復書云並

無其事乃未幾而賊又從濰河東軍汛地竄出矣夫守河責成各有汛地必以能守汛地與否爲功罪丁寶楨咨鈔七月二十三日奏稟意以濰河不守諉咎於藩司潘鼎新請撥東軍查潘鼎新僅統鼎軍步隊十二營初以膠萊北口海灘七八十里無可設防乃議由膠萊河南平地橫紮牆濠三十餘里北接濰河以十營守之臣與丁寶楨皆疊奏有案潘鼎新又以鼎軍二營接守濰河西岸十餘里其下至海面上空六七十里鼎軍何能獨認但盛夏水漲該處暫時無須多兵入秋後水漸淺涸潘鼎新亟請添撥撫臣派兵往守皆係分所當爲丁寶楨令王心安平字四營與道員王成謙常武十營陸續往紮旣無派歸潘鼎新統率明文潘鼎新卽不能兼管迨至失事距該藩司汛地四十餘里賊眾一撲卽渡常武軍相離最近尙不及救似不能苛責四十餘里外之鼎軍而丁寶

積事後牽混不責部將之不能堅守轉怪藩司之屢請添兵是非似欠分曉潘鼎新蒙恩僅予議處已在 聖明洞鑒之中惟各軍汎地乃行間功罪所關 臣不敢不略爲剖晰也 臣於濰河疏防後留詢劉銘傳潘鼎新實在情形據劉銘傳留復捻過濰河距銘傳汎地過遠當時不知其詳初一日沂州途次見王心安潰勇詢知該逆撲犯王心安所紮海神廟魚里鋪等處賊隊入營官軍尙多不知其四營隊伍傷亡過半王成謙常武軍營牆最近並未出隊接應潘鼎新留稱濰河空虛先以鼎軍二營與王心安四營分守一半嗣王成謙帶常武十營到防僅以八營填紮王心安四營原防地段潘鼎新因其認地過短與之力爭該道堅不肯添又以海神廟以下無牆之河商令王心安移守王心安已奉丁寶楨飭調回膠王成謙強留之頗相齟齬鼎新因賊已壓境苦勸王心安暫

畱協守甫兩日賊警大至王成謙又不肯就近抽援二十日辰刻賊已過河鼎新接其辰刻回信尙云並無賊蹤賊撲河西王心安所部亦陣亡數百人此次失事究非戴廟之比鼎新未能兼顧咎有應得而王成謙畏蒞取巧罪實難辭若專咎王心安則取巧者自謂得計請力持平允據情衡斷等語臣覆查王成謙所呈紮營地圖與潘鼎新畱稱無異臣就王心安前後兩次疏防情形逐細考究戴廟駐守年餘牆堅濠深竟任賊眾偷竄厥咎甚重至濰西四營原守汎地王成謙強令讓出移至海神廟無牆之岸賊警逼近長牆未紮移防甫二日而卽失事其情不無可原道員王成謙統帶常武十營赴濰籌防既商畱王心安協守應令仍守原段設王心安再有失事無可置喙乃該道利其已成營牆以八營填紮王心安四營地段而令王心安移守無牆之處賊來倉卒又不分

隊就近應援實屬畏葸取巧亦應分別奏參臣雖奉旨查辦王心安見統多營近在前敵若派員拏解誠恐激之生變應否仰懇聖恩將王心安罪名量從末減抑仍查照前奉諭旨嚴飭山東撫臣另派幹員接帶該營再行拏辦並山東候補道王成謙應否請旨暫行革職畱營效力之處均候聖裁此外各軍如有畏縮騷擾情事容臣隨時查明懲辦又奏臣於八月初十日在沂州督隊啟程十一夜馳抵臺莊次日接劉銘傳飛報初八日在贛榆沙河鎮佳穀山一帶遇賊鏖戰竟日追逐二十餘里擒斬頗多據擒賊供稱任賴逆首意圖竄撲運河臣因宿遷仰化集下至桃源清江西岸尚無陸軍駐扼卽派布政使劉秉璋督率所部及總兵沈宏富奇字七營由臺莊過河趕赴桃源會合浙連紮至清江以上設法堵扼劉秉璋等卽於十四日分起拔行接劉銘傳報稱初

十日追抵郟城賊已南竄紅花埠因卽趕辦軍糧再行追躡十三
四等日勦賊於沔陽之黃泥河等處連獲勝仗生擒逆首蔡有城
據供該逆恐秋後運東無所掠食急欲回桃源一帶空虛之處搶
撲運河等情適據浙軍統將李耀南余朝貴稟稱行抵清江已奉
漕臣張之萬飭令進紮六塘河南岸史家集莊家灘沈家渡等處
會同歐陽利見王可陞所部分段扼堵十五六日賊隊竄至宿遷
對岸及六塘河劉老澗一帶分股猛撲皖軍程文炳漕標姚廣武
等晝夜扼擊均甚得力連日陰雨運河增漲宿遷以上長牆森布
似可無虞惟六塘河日漸淺涸各軍甫經到防未知能遏奔突否
張之萬來函亦以仰化集以下運河未經設防如竄過六塘卽可
過運臣飛飭劉秉璋馳抵桃源先就西岸分紮營壘設賊南竄於
半渡扼擊之並令劉銘傳潘鼎新等緊躡賊隊兜擊牽制但恐阻

雨阻水道路泥濘師行致多阻滯殊爲焦急至從前議定運河原
恐膠萊之防倉卒難成先畫遠圍以扼歸路所集皖豫鄂各軍皆
以守本境者移守外戶能守固有裨大局卽不守可剋日回援計
固兩便而臣軍全係步隊追勦數省奔逐數年功效毫無精力實
甚疲憊無論賊竄何處責望悉歸於臣軍士必苦於驅逐勞怨不
支勢且潰決臣日夜憂之諸將稍懷忠義者皆力勸就地圍賊使
其竄地較狹追勦較近我得藉屯守以更番休息賊或限方隅而
漸有窮期以是曾國藩勸守賈魯沙河與運東臣又議守膠萊河
與運西皆萬不得已相機勢而爲之非謂遂有把握也自去歲豫
軍疏於汴南今則齊軍一疏於戴廟再疏於濰西人力不齊前功
盡棄膠萊河防三百餘里尙不可靠沿運千里調兵數省自謂可
恃乎朝廷因賊竄濰河甚慮河防難以堵截曾國藩聞賊竄出亦

有咨緘商及守運似可中止實係老成之見臣反復籌思賊正急欲出運萬一力堵不住亦勝負之偶然若先撤運防是示賊以弱也守運各軍早夜修防尙無疲倦較窮年迫逐者勞逸飢飽略殊忽令守又忽令不守是使軍心惶惑也運河東南北三面賊氛來往竄擾官軍分路兜逐地方必受蹂躪然不過數府州之地驅過運西則數省流毒無窮同是疆土同是赤子未便歧視也今使罷運防而另有制賊之法臣必速罷若更無可制賊似不若得守且守能戰卽戰盡人力以待事機如因地段寫遠致賊逸出或冬令水涸冰凍慮生他變再行相機變通辦理賊無常勢兵無定形以臣才力兵力竭蹶之狀辦此流賊尤不敢懸擬成局容隨時察度賊情會商曾國藩暨各督撫妥慎籌奪又奏軍行以糧爲最要臣部湘淮各軍向食大米自調北路勦捻曾國藩協設四鎮每處皆

就河道糧運以資軍食嗣遊擊東豫無米之處每就地辦麪穀充飢由各統領先行文地方官代向民戶照時價採買應用往往追賊緊逼之時因繞赴城鎮辦糧停待一日雖稍緩尚無缺誤自今夏賊過運河臣派各軍東征飭知經過州縣豫爲定購由營照市給價取用乃劉銘傳潘鼎新前赴膠萊沿途州縣卽有閉城不理者此次各軍由膠萊南下更形窘餓劉銘傳至郟城斷糧三月初十追賊至郟所過城寨閉關絕市有錢無處覓食勇丁啼飢致多困斃旱道艱遠斷不能多齎行糧若地方官不爲照料關繫實大臣由泰安沂州日向鄉寨紳民謀易麪穀草料以飼人馬亦有朝不保夕之虞至臺莊則轉運較便臣過沂州時曾面商丁寶楨亟須嚴飭運東各地方官豫提公款若干購存麥麪小米若干以便追軍過境給價採用儻各州縣推諉貽誤各營取糧不肯給價均

卽嚴行參辦昨又據劉銘傳來文咨催但未知該撫果否照行相

應請旨飭下山東撫

臣

妥速籌辦於軍事裨益匪淺如該州縣仍

前疲玩於各軍過境坐視不理有誤師行可否容

臣

隨時查明撤

參

上諭膠萊河北路本係潘鼎新認守地段該藩司並未親行

踏看丈量地勢續復改防濰河商令東軍移紮北路以致臨時移

調倉卒失事李鴻章屢奉諭旨催赴前敵調度遷延貽誤豈得盡

諉咎於東軍王成謙以八營自守而令王心安以四營認守無牆

之處又不分隊就近應援實屬畏葸取巧著卽革職畱營自效儻

再貽誤卽著李鴻章丁寶楨嚴參懲辦至王心安前次失守運牆

厥罪甚重早應正法此次防守膠萊河又復不能力戰遏賊據李

鴻章所陳該已革總兵廢弛軍務剋扣餉銀等情更未便再從未

減著該大臣仍遵前次密諭斟酌情形妥辦不可稍有宣洩並著

丁寶楨慎派幹員豫行接統其眾毋任別生枝節潘鼎新由膠萊追賊南行日久未聞與賊接仗儻再不認真剿賊卽著李鴻章嚴參懲辦亦不得稍涉瞻徇賊蹤見由宿遷東竄六塘河水日就淺涸仰化集以下防務未固該大臣當認真督飭劉銘傳等軍緊躡賊後與清淮各軍互相援應不得以清淮防務專諉諸張之萬致蹈膠萊覆轍運河防軍旣未便概行裁撤卽著仍前辦理惟當隨時相機兼籌迎剿不可但恃防守致令百密一疏任賊逸出貽誤大局至官軍經過州縣須就地採買糧草若任聽地方百姓閉羅致令兵勇飢餓絕食何以收飽騰之效著丁寶楨嚴檄各地方官豫行提款購買米麵以便追軍過境支用但近日淮楚各軍所至騷擾亦無怪百姓畏兵甚於畏賊並著李鴻章嚴申軍律飭令各營於經過民寨時給價採買不准索取如官軍有滋擾情事卽按

軍法懲辦不得稍有回護倘該地方官於客軍過境延不付給糧米卽著李鴻章丁寶楨立卽參撤以利軍行將此由六百里谷密諭知之○諭崇實駱秉章奏官軍剿辦夷匪獲勝並籌辦建南邊防一摺越巂夷匪出巢滋擾經崇實等分路剿擊疊次獲勝現甯野夷又復分股出竄九盤山夷匪竟敢潛入靖邊營汛地將拘禁夷目七名乘夜劫逃官軍追逐紛紛遠竄此股夷匪詎知邊防兵單乘閒出巢滋擾一遇官兵旋即逃遁並未大受懲創著崇實等督飭丁永陞會同越巂文武相機防剿並飭甯遠府知府督飭練勇會同冕甯靖遠各營員隨時防範以免此輩被竄至滇省自楊盛宗進剿迤西各營潰退之後沿邊土匪蠢起建南又復喫緊亟應趕緊設防該將軍等見已飭令劉寶國募勇調兵前往會鹽一帶著卽責令扼要布置以固邊圉將此由五百里各諭令知之○

予四川陣亡遊擊劉復玉祭葬世職○戊申諭軍機大臣等崇厚奏賊匪北竄大城派員會剿獲勝一摺梟匪由晉州竄至任邱大城一帶經崇厚派令都司鄭明保等帶兵會剿追至馮二莊地方鄭明保督隊施放槍礮傷斃賊匪數十名又轟斃賊目一名餘賊向南狂奔剿辦尙屬得手著卽檄飭鄭明保等乘此聲威會同各該地方官並知會各處鄉團協力剿截毋任蔓延此股賊匪前據劉長佑奏稱僅贖百餘名此次復傷斃數十名賊數已屬無多何難迅行剪滅直省軍務是劉長佑專責該督務當振刷精神嚴飭劉景芳余承恩各軍及州縣兵勇認真兜擊悉數殲除不得率聽屬員掩飾致逆氛紛擾畿疆頻煩兵力穆騰阿見紮任邱與大城文安等處相距不遠著懷遵疊次諭旨督率所部擇要分紮以遏賊蹤仍隨時知照劉長佑崇厚妥籌辦理將此由四百里各諭令

知之○諭裕瑞桂成奏回逆盤踞甯條梁並米脂縣城被圍一摺
陝省回逆屢次肆擾甯條梁一帶八月初三日賊匪萬餘將甯條
梁攻陷另股復圍攻米脂歸綏邊防甚形喫重雖經裕瑞等派撥
伊克昭等蒙兵分投扼紮並調土默特蒙兵五百名及大同鎮屬
官兵千名前赴歸綏相機防堵惟地段遼闊兵力尙單前諭趙長
齡派撥協防兵勇千名卽著催令星速出口裕瑞等此次調撥之
大同鎮兵一千名著趙長齡一併飭催趕緊出口裕瑞等當就見
有兵力嚴密堵剿毋令賊匪闖入所有山西協防官兵及續調大
同鎮兵並土默特蒙兵應需鹽菜口糧等銀均著趙長齡籌款撥
解以資供給此股賊匪在陝西山西毗連境界滋擾關繫三省邊
防及各蒙古地界若不及早撲滅勢將更肆蔓延著穆圖善派隊
前往剿辦將甯條梁剋期收復左宗棠庫克吉泰喬松年迅卽撥

兵力解米脂城圍會合穆圖善派出之兵分路兜擊以靖邊圉將此由五百里各諭令知之○己酉諭軍機大臣等穆騰阿奏官軍剿匪兩獲勝仗一摺梟匪竄擾張格橋等處經斌陞等督率馬步各軍於八月二十五日追剿兩次獲捷殲賊一百餘名見在受傷逃竄餘匪僅贖一百餘名賊數業已無幾著劉長佑穆騰阿懷遵疊次諭旨嚴檄各軍實力勦辦務絕根株該匪勢既窮蹙難保不藉詞投誠爲旦夕偷生之計惟該匪反覆無常萬不可恃如宋憬詩之首鼠兩端前車可鑒劉長佑務當激勵將弁將該匪悉數殄除不可遽行收撫致貽後患其逃匿餘匪並著劉長佑督飭地方官乘此大兵未撤之時認真搜捕毋任一名漏網另片奏請將將領斌陞等獎勵等語仍著將各該員暫行存記俟此股賊匪勦捕淨盡再行彙案請獎將此由四百里各諭令知之○停熱河圍場

試辦木稅○允劉峴奏湖南本年漕糧仍徵折色○庚戌諭軍機大臣等張之萬奏捻股疊撲劉老澗迎剿獲勝並請撥餉添勇英翰奏郟城擊賊獲勝分布戰守情形各摺片捻股竄擾郟城並窺伺宿遷運河經牛師韓黃秉鈞等奮力擊退其疊撲劉老澗之賊亦經姚廣武督軍奮擊賊遂移向北趨此次皖省及清淮各軍渡河剿匪以少勝眾奮勇異常視各路追軍逗留觀望者迥不相同深堪嘉尚牛師韓等著照英翰所請准由該撫存記彙案請獎其出力之姚廣武等亦著張之萬存記彙案請獎以昭激勸至捻逆以全力搶撲運河勢甚兇猛李鴻章張之萬英翰務當飭令防守諸軍分段嚴密堵遏毋稍鬆懈至此次當皖省及清淮各軍奮力迎剿之際若湘淮各隊能於賊後來擊則剿辦更易得手何以僅見劉銘傳緊躡捻蹤其餘潘鼎新等各營究在何處逗留著李鴻

章嚴檄前進會合勦洗毋得任其畏葸玩誤郟城係東境所屬丁
寶楨亦當督兵遏截不得專諉諸皖淮各軍任賊奔竄運河防守
各營如有縱令逆匪竄渡及並不奮力迎擊者卽著將本汛及統
領各官分別正法並革職治罪以申紀律而懲怠玩張之萬所請
添募馬隊十營並請撥餉銀一節前已有旨令張之萬增募並諭
令曾國藩按月協撥餉銀二萬兩曾國藩仍遵前旨速籌接濟見
在清淮軍情萬分緊要不可稍緩須臾該督當知緩急不得推延
致誤大局將此由六百里各諭令知之○兵部左侍郎三口通商
大臣崇厚奏請撤山東武定防河練軍回直以資防勦得旨卽將
陳濟清所部撤回靜海滄州一帶探明賊蹤會同余承恩等軍實
力勦洗以期迅掃賊氛○是月展緩山西薩拉齊廳被水上年民
借倉穀